

四庫全書

集部

欽定四庫全書

集部

攻媿集卷四十五至

詳校官右中允臣薩敏

主事臣呂雲棟覆勘

總校官庶吉士臣倉聖脉

校對官中書臣王鍾泰

騰錄監生臣崔鶴立

欽定四庫全書

攻媿集卷四十五

宋樓鑰撰

內制

右丞相趙汝愚加食邑實封制

門下朕祇膺丕緒肇祀合宮賴天地之靈儼百神而顧
享嚴祖宗之配綿萬世以承休惟時大臣贊我縟禮肆
頒祭澤敷告朝倫具官某寬博而崇深裕和而肅括學

造聖賢之蘊才兼文武之優有經濟四海之志而行之
以忠有酬酢萬變之智而決之以果擢由樞筦進秉國
鈞是為社稷之元勳非止衣冠之盛事處心無競休休
多容物之仁守道不阿蹇蹇盡匪躬之節予所毗倚國
其庶幾頃卜仲辛恭修大饗上稽皇祐之故典近遵慈
極之宏謨致精三日之齋虔奉九筵之制惟辟公之顯
相厥有賢勞顧熙事之備成敢云專鄉增多采邑併衍
真畬以隆巖石之瞻以壯維城之勢於戲載貂蟬而展

采固宰路之所同被袞繡以侍祠實宗盟之未有惟親
賢之並用于邦國以增光其服渙恩益圖治績

賜告口宣有敕卿為時上相贊我盛儀是宜與邑之
多用見疇庸之渥其祇成命母事謙辭

士歆加食邑實封制

門下朕嚴九筵之禮是曰肇禋逆三神之釐若蒙昭答
餽惠所暨臣鄰斯均矧惟屬籍之尊可後恩光之渥集
廷紳而誕告示詔縉之匪私具官某德性寬洪風猷端

粹重珪璽組生長富貴之中篤節駢旒雍容閒燕之久
惟夙夜之匪懈仰春秋之益高實長周家之宗盟是為
劉氏之祭酒茲崇宗祀預贊上儀冠班列于三孤聳儀
刑于九族乃加井賦仍侈圭腴以表耆英以隆孝治於
戲祭有十倫之義莫如同姓之先備者百順之名益介
遐齡之永願如壽俊奚假訓辭

賜告口宣有敕卿位冠孤卿望高宗老既奉合宮之
祀宜加采邑之封雖曰彛章是為新渥

郭師禹加食邑實封制

門下朕祇事總章荷神祇之來格廣施惠術普中外以
惟均顧予元舅之親嘗預羣工之相肆加異數明告周
行具官某迪德忱恂飭躬謙靖祖后實為同氣壽皇尤
篤優恩淑旂綏章蚤授齋壇之鉞篆車希冕近升棘位
之班疏三吳公社之封廩萬壽祠庭之祿能屏膏粱之
習自忘圭組之崇比卜季秋親祠重屋茂對三神之祉
宜先四姓之賢用衍爰田載加真食於戲兢兢業業以

事上帝朕敢懷專鄉之私洞洞屬屬而存小心爾尚介
方來之寵益昭吉履永保修名

賜告口宣有敕禮畢九筵恩均百辟賜予伯舅之胙
均茲宣室之釐與邑宰多頌綸可後

周必大加食邑實封制

門下朕嗣守邦圖肇修宗祀父天母地祭既重于合祛
尊祖敬宗禮尤嚴于並禘予一人越縉以行事爾多士
奉璋而侍祠眷舊弼以興思顧廢條之可後誕揚渙號

敷告昕廷具官某簡重而閎深直方而膚敏典誥上規
于姚姒詞章遠軌于漢周弼亮兩朝未究經綸之蘊鎮
安四海有懷康濟之功偃藩南國之雄均逸東山之勝
比以霈恩之渥升之亞傅之崇注想不忘乞言方切屬
伸大報爰啟合宮載謀載惟聖父嘗頌于先甲我將我
享季秋乃卜于仲辛熙事既成蕃釐來介申衍多田之
賦仍加真食之封於戲明堂王者之堂方荷神休之答
二老天下之老宜先祭澤之施尚迪遠猷永綏殊寵

賜告口宣有敕卿嘗位冢司均休真館屬總章之竣
事賦多邑以示恩其即欽承以祇眷渥

師夔加食邑實封制

門下朕寅紹丕圖虔修大饗親惟伯父既有助于多儀
神介蕃釐詎敢云夫專鄉亶敷命綍用告昕廷具官某
履行粹和稟質端靖生長神明之胄源流詩禮之傳出
分顧愛見民庸之甚茂入趨班綴奉朝謁以尤恭建六
纛以承家視三公而命秩屬講聲禋之禮適當越紼之

行攝事太宮降登有度陪祠重屋顯相無違庸推祭澤
之優可後宗盟之懿爰加井賦併衍畬租茲謂恩施式
昭名數於戲奉犧牲梁盛而告聿嚴布政之宮拓山川
土田之封益示展親之義其祇異渥以對靈娛

賜告口宣

吳瓌吳
琚同

有敕禮成重屋賚及萬方宜首及

于懿親用申加于多邑載頌明命其服殊恩

吳瓌加食邑實封制

門下朕穆卜季秋躬修大祀靈祇授職幸熙事之備成

多士在廷賴懿親之顯相宜頌惠術敷告羣工具官某
謹畏自將純和無玷聯四姓小侯之貴承三朝外戚之
恩入侍中宸屬橐鞬而甚肅進班上閣飭冠佩以尤嚴
頌建齋壇退安琳宇旋視孤卿之秩併開公社之封建
及禮于九筵實均釐于萬國乃增采邑仍衍圭腴以彰
寵數之優以表肅雝之助於戲蒐上儀于陽館豈惟黍
稷之馨錫蕃祉于后家可後賑膳之賜尚綏吉履以服

彝章

吳琚加食邑實祇制

門下合宮肇祀實祇奉于慈謨宣室受釐爰大頒于霈
澤惟時懿戚夙著賢稱庸舉徽章式孚渙號具官某美
由世濟才應時須登簪筆持橐之聯惟知避寵更握節
擁麾之選不專為恩比崇建于齋旒旋寢加于孤棘逮
茲大報贊我上儀禮既備于八階胙惟優于四姓俾增
多賦仍衍真腴於戲文德以講明堂幸神祇之顧饗賀
慶以親異姓宜福履之均霑雖曰邦彝尚承惠渥

郭杲加食邑實封制

門下朕頃用盛秋虔修宗祀奉犧牲以薦備陳重屋之儀賴爪牙之良肅領千廬之衛既云竣事可後均釐我有明綸告于列位具官杲生資沈毅世濟忠勤氣稟山西期遠追于起翦書傳圯上自有合于孫吳久專將閫之雄入侍殿巖之邃屬祇孝饗務罄齋誠奉璋惟多士之賢執戟有元戎之重肆疇采邑仍啟侯封以介靈休以彰異渥於戲茅簷蒿柱朕方躬大禮之嚴玉節琱戈

爾尚體中權之寄益思忠報以答殊知

賜告口宣

蕭鷓巴同

有敕禮嚴重屋澤及羣工錫多邑于

巖除啟新封于侯甸

蕭改眷我勤臣疇茲多賦

其祇明命益勵忠

猷

蕭鷓巴加食邑實封制

門下奠圭瓚以薦誠既虔修于宗祀執豆籩而在列宜
咸被于靈娛眷我虎臣董茲羽衛厥有渙恩之錫式彰
顯相之勞具官某智略雄深性資沈鷲望雲就日夙肩

面內之誠建旒設旄馴致總戎之拜奉真祠而均佚視
左棘以疏榮乃因霈澤之行增畀爰田之賦申加真食
用侈神休於戲承異眷于三朝蓋屢覲彌文之盛敷大
賚于四海顧可無寵數之優益綏令圖以保終吉

郭師禹特授少師封永寧郡王加食邑實封制

門下朕纂上皇之丕緒承列祖之通喪復土告功既克
襄于大事提綱置使實有賴于懿親爰播明綸肆加殊
寵具官某小心自牧吉德著聞蚤席慶于椒闈寔升華

于棘位恂恂家法靡矜金穴之奢侃侃朝班久遂琳宮
之適茲卜會稽之麓往營永阜之陵靈駕徐驅飭廡儀
而肅靖重臣主辦訖閱寢之固安粵惟元舅之崇可忘
醜賞之報翳勞之稱匪朕敢私袞服命主顯冠孤卿之
秩金印盩綬進封異姓之王仍旄鉞于東秦徹土疆于
南晉申陪井賦併侈轅疇以昭四姓之華以篤三朝之
眷於戲節侯仕漢得謹畏謙恭之聲尚父在唐有富貴
繁衍之盛豈其苗裔見此親賢其踵前人之休以為密

戚之勸

賜告口宣有敕阜陵復土元舅策勲既升冠于孤卿
仍疏封于王爵其祇渙渥母事謙辭

皇伯祖太師嗣秀王伯圭特授兼中書令加食邑
實封制

門下朕祇紹炎圖邁繩祖武追仰抱孫之愛謹奉嚴塗
實繫同氣之賢式專使領克襄大事悉按舊章昭示殊
褒用孚羣聽具官某聯休皇極正位泰階直大以方厚

載體坤文之二爵齒與德達尊全天下之三惟我孝宗
最崇秀邸眷乃象賢之懿襲茲開國之封敬其所尊愛
其所親今當推于宗老反也如疑往也如慕況密護于
戲儀每入臨于朝晡曾不避于塗潦能以從心之歲躬
為復土之勤有司莫敢不哀行路為之感動語必流涕
誓報平生之恩賞不踰時肆舉非常之典是兼紫微令
之重以為大父行之華仍衍爰田併豐真食匪以爵而
馭貴恨無言以酬公於戲隆專席之榮蓋用祥符之故

實第中書之攷曾參尚父之勲名以增師尹之嚴以侈
邦家之盛益綏壽嘏庸對寵光

賜告口宣有敕卿貴隆人爵尊襲王封親臨永阜之
藏寵冠中臺之列是為殊深尚體眷懷

右丞相趙汝愚特授銀青光祿大夫加食邑實封

制

門下聖人因親教愛蓋本于躬行大臣以道事君莫先
于協贊朕方遵皇祖之訓形四方之風眷我宗英相予

孝理惟忠勞之備著繫命數之宜加爰集具僚載申褒
律具官某崇深而行簡直諒而能容學有淵源究前聖
天人之蘊志存節誼立本朝社稷之勲相業素高民瞻
允屬自擢登于右揆獨光輔于冲人於皇孝宗克振炎
祚朕既荷綠車之鍾愛遂紹于重規卿亦蒙丹扆之異
知寢基于大任惟推心而相勉念圖報之尤難三年之
喪服勤敢怠七月而葬宣力居多因山為陵得邱原之
爽塏稱天定謚極寶冊之鋪張迓吉仗以來歸奉太宮

而班祔誠信無悔哀禮有餘仰慰在天之靈實由同德之助
是用超文資之峻徑授三階衍并賦之腴幾盈萬戶勉從遜
牘少屈恩綸於戲明德懿親既居金鉉黃耳之貴勞謙終吉
僅登銀章青綬之聯益成廉退之名尚副倚毗之意

賜告口宣有敕卿祇奉阜陵爰加賞典班既高于百
辟位亦次于三公其體眷懷亟祇成命

皇伯祖太師嗣秀王伯圭特授兼中書令加食邑實封制
門下朕丕膺寶祚加厚皇支惟我祖之君萬邦既訖因

山之禮顧天子之謂伯父實參置使之行春吉仗之言
旋宣褒緡之可後視儀宰路敷號廷紳具官某賦敏給
之資擅溫恭之譽分左符而出鎮嘗專制閩之雄易留
務以歸班徑擢齋旄之峻迨冲入之臨御進孤保以疏
恩鳳闕晨趨見朝儀之甚肅鯉庭日侍知家法之尤嚴
匪惟族姓之光允謂衣冠之盛比營東越崇建阜陵願
躬除道之勤往護成梁之役久安閒燕退若無憑小試
才能燦然可覩宜加寵數以答賢勞公府肇開遂擬三

師之貴珍臺兼領併增千戶之封用侈宗盟茲為使相
於戲有是父有是子俱膺華袞之榮拜于後拜于前克
紹緇衣之美勉圖休問以對殊私

賜告口宣有敕惟予伯父表我宗盟爰升袞鉞之華
已播絲綸之寵其祇異數毋事謙辭

知樞密院事余端禮特授銀青光祿大夫右丞相
加食邑實封制

門下稽古建官莫重王朝之論相代天理物必資揆路

之得賢朕臨御惟艱疇咨敢怠爰命紫樞之長進居黃
閣之崇乃輯廷紬誕敷制綽具官某溫恭而氣勁凝靜
而謨明智周萬事之原學貫九流之遷孝宗擢之于庶
列亟躋法從之班聖父召之于留都遂處輔臣之任益
殫忠蓋力贊政幾迨予嗣歷之初尤藉同寅之助迭掌
東西之二府兼明文武之兩途內則密勿廟論以慮四
方外則整齊戎律以令諸將清規足以範俗深謀足以
濟時進退百官詳試知人之鑒調娛衆務究觀識治之

才蔽自予衷與之國東用正鈞衡之寄毋勞夢卜之求
超授文階增陪井賦以示奮庸之選以昭注意之隆於
戲夙夜基命而單厥心朕欲起太平之盛朝夕納誨以
輔台德爾其繼良弼之名表正士風訪求民瘼及間暇
而修政刑之要專變理以致陰陽之和若股肱耳目之
相位若天地祖宗之臨汝懋承明渙期底成功

賜告口宣有敕卿比領樞廷兼行相事茲延登于石
揆已誕布于明綸注意方深拜恩可後

攻媿集卷四十五

欽定四庫全書

攻媿集卷四十六

宋樓鑰撰

內制

伯圭再辭免兩鎮節度使不允批答

紹熙五年九月

省表具之朕惠于宗公務隆于體貌相予肆祀可後于
恩褒位已極于人臣官無加于師尹兼授齋壇之鉞倍
多并賦之租是曰異章未為異數儀刑所繫以為泰乎

俯偃之恭再斯可矣

口宣有敕卿位冠三公望高九族茲相合宮之祀用
領雙節之華具服恩榮毋為謙避

伯圭再辭免兩鎮節度使不允仍斷來章批答

省表具之朕尊寵帝師惟恐不至優崇元老尚竊慙然
故因大饗之成曲示異恩之渥載加少府之節復登上
將之壇城南天下稀舊臨樂土漢東國為大併領名藩
式慰具瞻益綏多祉既無反汗之理奚事循牆之恭

口宣有敕卿德齒俱尊名位皆備欲侈三卿之寵遂
疏兼部之恩何必固辭亟祇成渙

侍講陳傳良朱熹宣赴經筵供職曲謝宣答詞

有制朕務明政體首闢經帷嘉舊學之來歸喜耆儒之
同集其思忠告以副疇咨

初講畢案前致詞降殿曲謝

陳傳良

有制首領名命渴想忠猷聳聞講貫之詳恍若從游之

舊克諧朕志益啓乃心

朱熹

有制久聞高諧傾佇嘉猷來侍邇英之游講明大學之道庶幾于治深慰予懷

余端禮再辭免知樞密院事不允仍斷來章批答省表具之卿自造本兵積隆時望有致君澤民之志有憂邊思職之勤迨參政幾又嘗共二其于基命宥密之地詳練久矣茲疇樞長非卿誰屬夫本強則精神折衝

制千里之勝者其機實在於廟堂尚究遠圖以祇寵命
朕志決矣勿復有辭

口宣有敕卿精白承休勤勞匪懈爰自政途之竣載
登宥府之崇成命既行牢辭勿再

京鐘再辭免參知政事不允仍斷來章批荅

省表具之本兵之任方倚于壯猶共政之求更資于夾
輔朕圖回治道選用柄臣眷一相之處中有嘉同德惟
萬幾之甚衆允藉協恭卿之長才朕所深識奏陳剴切

副決精明進參駿淑之嚴益冀訂謨之告既領再命毋
事三辭

口宣有敕卿召歸全蜀旋貳洪樞茲膺共政之圖實
倚告猶之益何勞謙避其遂欽承

鄭僑再辭免同知樞密院事不允仍斷來章批答
省表具之朕惟孝宣樞機周密用以中興漢道于今本
兵之地无號才難卿以魁碩之才為士夫儀表踐揚最
久望實具孚茲焉登用朕非以私于卿所以尊朝廷也

朕方庶幾孝宣之治卿志在體國其遂秉德以陪朕顧
宣以執謙為美乎

口宣有敕卿屢分帥閭三總吏銓茲進貳于機廷方
允符于輿論亟其祇命何必固辭

郭師禹再辭免師不允批答

省表具之朕惟三孤之貴卑于公尊于卿異姓之王直
以茅胙以土皆本朝之所重非懿戚而誰居以卿德量
有餘忠誠匪懈受隆知于烈祖不專為恩護大事于阜

陵克勤乃職迨茲歸報可後褒嘉既敷號以明揚雖循
墻而安避毋為苛禮徒拂眷懷

口宣有敕位尊三少爵重異王用酬使領之勞已播
廷揚之命游被遜牘其服殊恩

郭師禹再辭免少師不允仍斷來章批荅

省表具之鄉世為懿戚任厯累朝惟孝宗之恩每思所
報故阜陵之役獨護其行人徒見闔門而養威今乃知
任事而能辨位列三孤之長封疏五等之崇揚于大廷

協彼公論何為固避屢卻復來其亟受于寵章毋重陳
于遜牘

口宣有敕阜陵庀役總使有行既竣事以來歸乃疏
恩而示寵其祇一札何事三辭

伯圭再辭免中書令不允批答

慶元
元年

省表具之卿以伯祖之尊上公之貴名位已隆而無事
任之累富貴已極而無危溢之虞壽考康寧子孫蕃衍
此于人間世尚何慕焉獨惟烈祖孝悌之至則友其兄

朕追仰音容如在左右古者思其人猶愛所憩之棠况我祖同氣之親乎是以因使範之勞加寵數之重夫高允之在魏子儀之在唐俱以令公名者豈惟爵秩之崇蓋以德為貴也惟我父師尚何辭于此哉

口宣有敕鄉黨齒俱尊忠孝兼備茲授令公之秩為皇族之光毋復固辭亟宜祇命

伯圭再辭免特授兼中書令加食邑實封不允仍

斷來章批答

省表具之朕攷國朝官制尤以中令為重親賢如魏魯
陳韓諸王為此官者僅六七人元豐中曹佺以帝舊兼
令有司謂無給俸之例則其稀闊又可知矣卿為達尊
執德彌劬久虛之典非卿尚誰當之近命元子寵兼袞
鉞恩禮之盛萃于一門邦之榮懷匪曰予私辭之至三
斯可已矣

口宣有敕卿位極人臣德高帝胄爰拜中臺之長以
彰元老之尊寵命既頒謙辭勿再

余端禮再辭免右丞相不允批答

省表具之君臣相逢謂之千載上下協濟本乎一心必
能如風雲之從斯可不膠漆而固惟鄉朴厚副朕倚毗
雖累年務罄于論思而近歲又殫于忠力眷政府樞廷
之更踐知文事武備之該通儀圖老成宜置左右試之
已久斷然不疑惟昔宗盟嘗居冢宰之任若時鄉衮亦
應柘溪之祥尚期遠邁于前人相與共興于大業朕所
望者卿何辭焉

口宣有敕卿比握兵機實專政柄乃徑登于次相仍
累進于崇階其服寵光勿為多遜

京鏜再辭免知樞密院事不允仍斷來章批答

省表具之朕惟本兵之司有國所重必得樞機周密乃
可圖功自非智略縱橫何以稱職卿之能事朕所素知
今制閫則推師師之良登政途則著輔弼之望威名日
起遐邇具瞻其勵壯猶益運幄中之奠坐銷外侮以收
堂上之奇宜已需章毋留朕命

口宣有敕卿資兼文武望聳華夷輟東府之大臣長
西樞之重任明綸已播遜牘毋煩

鄭僑再辭免參知政事不允仍斷來章批荅

省表具之朕修明庶政務興起于事功圖任舊人乃布
揚于命告卿行為世表文擅國華瑣闈銓部則著忠蹇
之名侯藩留籓則備恩威之美再儀禁路增重朝行既
擢貳于本兵茲進參于駸駸其體責成之重毋為避寵
之煩

口宣有敕卿擢在樞廷久隆人望茲進參于大政庶
益重于本朝游貢忱詞亟祇明命

謝浚甫再辭免簽書樞密院事不允仍斷來章批

答

省表具之朕惟九五正位每切圖安二三大臣所當遴
擇乃眷幾廷之貳必求禁索之英卿外寬而內明氣和
而才劭凡一時清切之選以數載周旋其間封駁之嚴
屢回主意抨彈之勁益振臺綱勸誦以來陳謨尤切茲

肆領于一札俾參掌于五兵出命惟行抗章可已

口宣有敕卿備歷華筵寢高雅望茲自憲臺之長入
參樞筦之嚴朕命既孚卿辭毋費

余端禮再拜辭免右丞相不允仍斷來章批答

省表具之商宗之命傳說也爰立之初訓告具存惟說
以天下自任祇若休命不敢辭也朕之論相則又詳矣
大號揚廷與衆共之需章以來既已再卻而猶未已何
耶朕之菲涼有賴啓沃式克欽承卿其可使古人專美

于前乎三命而傳其可已矣

口宣有敕朕妙選儒英俾登揆路欲專裁于庶務顧
俯事于三辭難徇勞謙亟命成命

賜右丞相錢象祖褒語

朕更化之初論相為急注意已久無踰卿者大臣義當
體國勿為牢辭往哉汝諧毋稽朕命

附劄子臣護望清光仰蒙聖慈開納芻蕘之言不勝
千載之幸再被宣旨令撰右丞相錢象祖褒語進上

竊思制麻已宣無可辭之理臣退方供職所有答詔章良能必已撰述臣謹撰褒語進呈更合取自聖裁

開禧三年十二月二十四日
翰林學士知制誥臣樓鑰

新除右丞相兼樞密使錢象祖再辭免不允批答省表具之漢之丞相無所不統孝宗正名委任深重朕更化善治注意尤精以卿忠孝之家台輔之望踐敬中外多歷年所邇者再預政機能斷國論去凶舉賢人望愈歸播告廷紳士夫至于相賀何謙何疑固辭不已矧

是邊陲之未靖尤資右府之壯猶三命而俸執謙甚矣
朕志已定決無反汗之理卿其自任天下之重稱朕意焉
口宣有敕卿兼文武之資體家國之重既已領于制
綽何尚執于謙詞毋違朕言亟正台席

新除叅知政事衛涇再辭免不允仍斷來章批答
省表具之朕更化之初惟二三大臣是賴以卿倫魁之
彥密在邇睽贊決廟謨擢升獨坐尋畀洪樞之任仍叅
駿馭之嚴茲焉正名以贊台揆內則百實之欲治外則

三邊之未寧此為何時而執故典其體責成之意勿為
逃避之煩

口宣有敕卿近以樞廷遂參政地茲焉錫命止用正
名尚禪當軸之謀無執循牆之謹

新除參知政事雷孝友再辭免不允仍斷來章批答
省表具之朕躬覽萬幾與民更始欲解琴瑟之舊允藉
股肱之良卿久矣蜚英居焉難進比處代言之任實懷
憤世之心預同密謀卒殄元惡擢居瑣闥遂長憲臺欲

新億兆之觀瞻尤急二三之輔弼其祇予命亟贊政幾
國事匪輕謙辭可略

口宣有敕卿由中執法為吾大臣正資經世之猷以
贊濟時之相朕志先定卿辭勿煩

新除端明殿學士蒸書樞密院事林大中再辭免
不允仍斷來章批答

省表具之卿養氣以剛秉心無競出藩入從榮利澹然
久安燕居不容何病朕一新治具急欲求老成典刑以

鎮服中外起舊德于垂車之後還人望于持索之班天
謨朕前尤見克壯亟升書殿進貳宥庭人無異辭國以
增重時則可矣尚何遜焉

口宣有敕卿禁班老成人望久屬擢寘幾庭之貳正
資兵本之謀尚復奚辭往其祇服

楊次山再辭免開府儀同三司不允批答

省表具之朕愛惜名器惟賢是予由掌武之官而視儀
揆路品職益崇其可輕畀卿以肺腑之親服在爵位靖

共自飭廉介有餘爰示優恩用字至意而又何辭焉母
復重陳五宜就列

口宣有敕卿朕芳椒掖均逸琳宮爰開公府之華實
視台躔之貴其祇茂渥母事牢辭

經筵進講毛詩終篇宣答詞

宰執赴聽講致詞謝

有制朕臨御今十五載講詩終三百篇卿等同觀朕心
惟懌尚其協贊助我緝熙

侍讀侍講官奏賀

有制朕日勤三接共講四詩既徹篇章實資問學深賴
主文之諫載嘉歸美之勤

宰執率經筵侍立官再奏賀

有制朕積朝夕之勤終雅頌之業究觀六義用菽一言
尚冀輸忠毋忘進戒

皇太子再辭免侍立會議不允批答

嘉定元年
閏四月

省表具之近頒中詔命元子以侍朝仍諭大臣集東宮

而會議是為令典非用前規顧予教爾以義方俾爾預聞于政理躬臨五學既親賓友以交修密拱九重具見君臣之相與爾能進德予自忘疲何以辭為再斯可矣口宣有敕爾為元子年近成人俾入侍于昕朝且預聞于幾務勉親多益毋事牢辭

衛涇乞解罷機政不允仍斷來章批答

省表具之朕厲精更化遭時多虞延登俊良列在輔弼當經綸之始賴協力以共謀迨平定之初乃奉身而求退朕

所未喻卿尤無他知出處之素明見忠勤之曲盡五十
而服官政在古訓以甚明三千而惟一心矧大臣之無
間倘遽欲去吾誰與居勿為封奏之煩尚體眷懷之渥
口宣有敕卿以同德任吾大臣一為進退之圖實有
重輕之繫尚安位著庸副朕心

褒語卿貳政更化之初備宣忠蓋朕所眷屬何人異
辭告歸無名理難曲徇

效魏集卷四十六

欽定四庫全書

攻媿集卷四十七

宋樓鑰撰

內制

提舉淮南東路常平茶鹽公事陳損之獎諭敕書

以常平司見在米麥及收糶物斛
分撥入州軍賑糶共二十萬石

朕嗣服之始早潦相仍宵旰興懷務行實惠首形詔告
所望部使者推廣上恩初不以重賞為憚也卿使淮堧

蓋嘗久興水利茲又能發其餘蓄上不仰給于大農下
有以平八郡之糶邊民被惠已廣而又將為後日之儲
有臣如此實寬顧憂載覽奏章良深嘉歎

賀金國生辰使副梁總戴勲到闕傳宣撫問并賜
銀合茶藥口宣

卿等遠聘殊鄰旋歸近境念舟車之勞勤頒茗劑之珍
芳仍命行人往將予意

賜銀合臘藥敕書

荆湖南路安撫使王簡

卿西樞故老南國元侯念茲歲發之辰賜以奇珍之劑
體予至意勉爾壯猷

四川安撫制置使趙彥適

卿視儀兩地出鎮四川錫品劑之奇珍慰風寒之匿薄
益厚願養用寬顧憂

主管侍衛馬軍行司張師顏

卿肅領騎兵分屯江國頒寶奩之珍劑慰玉帳之凝寒

其體眷懷益恩忠蓋

御前諸軍都統制閻世雄皇甫斌張詔趙厥劉

忠劉震

卿等肅提禁旅列戍藩方念久處于轅門俾匪頌于奩

副毋云例卷其服恩綸

御前諸軍副都統制馮湛張國珍田世輔李世

廣王宗廉王知新田舉

卿等遠臨外戍密贊中權念營壘之嚴寒錫禁庭之上

藥尚思奮勵以答恩私

報登寶位使副鄭滉訖仲壬到闕傳宣撫問并賜
銀合茶藥口宣

卿等握節言旋及門伊邇厚蒞劑珍芳之賜勞川途跋
履之勤庸序爾情特將予意

賜銀合夏藥敕書

荆湖南路安撫使王簡

卿嘗位元樞往臨南楚爰錫珍芳之劑用清暑愠之祥

將以寶奩賁于帥間

四川安撫制置使趙彥適

卿不辭叱馭諒已聞藩爰加珍劑之頒仍賁寶奩之賜
用示恩于宗老期解愠于吾民

侍衛馬軍都虞候張師顏

卿總提騎將往駐金陵當瘳暑之在辰出珍芳而分賚
尚綏衆士如濯清風

御前諸軍都統制閻世雄張詔趙廐劉忠劉震

田世輔

卿等分戍价藩撫安戎壘出上方之涼劑分內府之珍
奩坐覺生風諒欣承命

御前諸軍副都統制馮湛張國珍李世廣王宗
廉王知新田舉

卿等分提禁旅密贊戎和乃馳賜夫芳珍冀遠清于蒸
鬱惟茲解愠可以忘勞

賜銀合夏藥救書

知潼川府費士寅

鄉舊居兩社出撫東川緩帶輕裘遠著藩維之效寶奩
珍劑往寬夾鬱之煩益謹節宣以綏寵渥

四川宣撫使安丙

卿任聯執政職佐宣威蜀道籌邊想帥垣之多暇暑風
屆候將珍劑以分頒豈惟清遐徼之塵抑以解吾民之
愠

江淮制置大使丘宗

卿恩視政塗任分制閩炎威將熾念戎幕之賢勞靈劑
匪頒均上方之珍品庸昭渙渥以滌歌煩

四川安撫制置使兼知成都府吳玠

卿寓直從班鎮臨制閩增雪山之重念撫御之良勞當
南風之薰冀節宣之撫爽爰頒珍劑庸示優恩

京西湖南北路宣撫使宇文紹節

名在經幃威宣將閩上流增重念裨暑之賢勞良劑匪
頒助薰風之清穆其均此賜以慰彼民

殿前副都指揮使兼江淮制置使趙淳

職領殿巖任隆制閩屬風埃之甫定當溽暑之寢隆爰
錫珍奩用將寶劑坐消煩鬱仍助節宣

侍衛步軍都虞侯措置防捍江面王處久

肅領衛兵出臨天整鋒壘多暇溽波不驚屬當炎暑之
隆宜厚珍芳之錫尚承殊渥以豁煩襟

侍衛馬軍行司權管轄本軍馬職事張良顯

肅提精騎分駐留都當溽暑之寢隆屬風埃之甫定爰

碩珍瀾用滌煩襟益謹節宣以圖綏靖

御前諸軍都統制李郁畢再遇秦世輔王大才

彭輅

某等肅提戎律綏靖邊陲當滄暑之寢隆屬風埃之南
定永懷勞勩宜助節宣爰畀珍芳以銷煩鬱

御前諸軍副都統制周整莊松何汝霖劉元鼎

魏友諒薛九齡王鉞

某等協佐戎昭克勤軍務撫帥徒而整暇當炎暑之蘊

隆緘寶劄以分頒即柳營而加勞

賜安南國王李龍翰嘉定二年歷日敕書

敕安南國王某朕仰稽天運豫受民時爰分歷象之書
徧及方隅之境眷惟南國世奉中朝此疆雖遠于山川
嗣歲先頒夫正朔用均惠利尚克欽承

金國弔祭使人赴關口宣

紹熙五年十月

盱眙軍傳宣撫問賜御筵

有敕卿肅持使指來慰國哀眷入境之云初豈肆筵之

可後往宣予意以勞爾勤

鎮江府賜銀合茶藥

有敕卿等肅擁使華遠將慰禮經鐵甕山川之險錫寶
奩茗澗之珍宜體眷懷用安旅次

鎮江府賜御筵

有敕卿等來趨素幄行次丹陽雖深銜恤之悲不廢示
慈之宴是將厚意式寵行人

平江府賜御筵

有敕卿等遠從燕驛近及吳門深嘉暗問之勤宜備賓筵之渥其承異眷益進來程

金國弔祭使人赴闕口宣

赤岸賜酒果

有敕卿等遠將慰問來屆近郊先之旨酒之頒增以嘉肴之錫少安次舍用息勤勞

賜御筵

有敕卿等握節戴馳赴疆來弔將展國喪之禮宜先郊

勞之儀其體者私少休區薄

賜被褥鈔鑼

有敕卿等遠致奠儀久勞客路爰厚寢衣之賜仍分盥
器之珍跋履之餘撫存加渥

密賜大銀器

有敕使華既接帛禮斯勤宴已備于饗殮器仍加于銀
鏤是為異渥少慰賢勞

賜生餼

有敕卿等少安賓館既畢吊儀按聘禮以受饗命廩人而致餼諒均徒御咸體眷懷

賜內中酒果

有敕卿等禮謹吊喪退將即次頒酒殺于內府示恩寵于來賓意則一餘物惟俱稱

朝見訖歸驛賜御筵

有敕卿等慰此國哀見于喪次爰暫休于燕館用初秩于賓筵首示殊私嗣加好賜

就驛特賜衣服金帶銀器衣著

有敕卿等吊喪自速率禮無違器分山溢之珍衣有身
章之寵雖云多品未盡至懷

賜內中酒果

有敕卿等肅將使節來唁喪悼嘉有客之多儀出尚方
之珍品甘芳俱厚寵眷彌加

在驛特賜射弓酒果

有敕卿等既肅哀儀難修賓射雖輟主皮之藝仍加設

醴之勤敬核俱頌情文尤厚

特賜射弓御筵

有敕卿等交鄰有道序賓以賢屬當變禮之時仍飭初筵之賜穿楊何取折俎惟優

特賜射弓例物

有敕卿等慰予國恤厚乃賓儀雖觀射之未遑顧匪頌之可後悉從常禮以表眷懷

朝辭訖歸驛賜酒果

有敕卿等弔哀事畢贈賻禮成將邁車馬之歸載厚壺
邁之錫其承嘉貺復啓長途

賜御筵

有敕卿等既趨素幄遂別彤墀禮下替于權輿恩更加
于觴豆尚安旅次徐屆歸程

回弔祭國書

皇祖上仙嘗馳赴問沖人嗣位方服通喪荷信使之遠
來辱弔儀之加厚益堅盟好彌切感懷哀疚既深敷陳

難究

回賀登寶位國書

祇奉慈謨，勉承丕祚。比飭行人之告，茲勤信使之來。儀物有加，書函允備。既荷禮文之厚，益欣盟好之堅。爰謹報章，用陳謝悃。

報謝登寶位國書

祖武是繩，孝思方切。勤使華之遠，暨知盟好之彌。隆品物，具陳情文，俱稱比已。騰于報，橫爰再飭。夫行人仍致。

彝儀用將謝悃

報謝賀慶元元年正旦國書

三陽攸慶方夙戒于行人萬里交歡復遠勤夫信使惠
以函書之厚加之篚幣之豐爰飭報章備宣謝臆惟益
堅夫世好冀均介于春祺

金國弔祭人使回程口宣

賜龍鳳茶并金鍍銀合

有敕遠修吟問茲遂旅歸茶分北苑之珍器備南金之

飭是為異渥用慰遐征

赤岸賜酒果

有敕卿等返旆云初出郊于邁加六壺六邊之饋致三
辭三揖之勤式慰爾歸用將予意

賜御筵

有敕卿等成禮云歸啓途未遠意方勤于郊送恩宜視
夫履初既厚眷私益堅信睦

平江府賜御筵

有敕卿等弔儀既備使事言旅行已次于蘇臺恩仍頒
夫鎬燕禮及加厚客路具宜

沿路賜使副冬至節絹

有敕使且北歸日方南至載念脩途之役俾加厚幣之
將其服恩榮尚寬旅思

讀祭文官

有敕卿遠陪膚使歸遇新陽爰頒束帛之溫以助重裘
之煖益昭眷渥庸慰賢勞

三節人從

有敕長至維時遠歸在道言念禦寒之具特加實篋之
珍賚賜有差恩私無異

鎮江府賜御筵

有敕卿等來修慰禮既畢使儀望北薊以還轅至南徐
而憩節庸加燕衍其悉眷私

盱眙軍賜御筵

有敕卿等來成使禮歸次邊疆更加燕豆之勤不替權

興之舊其承眷禮遂戒征速

金國賀登寶位使人赴闕口宣

盱眙軍傳宣撫問賜御筵

有敕卿等持禮遠來入疆伊始念川途之區薄加燕勞
之優隆徒御少休賓儀無爽

鎮江府賜銀合茶藥

有敕卿等來擁使華遠申盟好念舟車之勞役頌茗劑
之珍芳爰飾寶奩以迎玉節

賜御筵

有敕卿昨云初親仁是務肅使華于近鎮謹賓禮于初筵益屆來程以承眷渥

平江府賜御筵

有敕卿等遠持賀禮來次輔邦再加燕衎之私庸示眷存之渥少休跋履且慰勤勞

赤岸賜酒果

有敕卿等來次郊闈肅將賀禮寵以上尊之賜加之碩

果之珍式佇來游以堅信好

賜御筵

有敕初御丕圖遠勤信使既次郊關之近載如燕豆之優其體眷私以承虛佇

金國賀正旦使人赴闕口宣

盱眙軍傳宣撫問賜御筵

有敕卿等遠將聘禮來賀歲元既加壹勞之勤首示肆筵之渥其祇眷意益謹賓儀

鎮江府賜銀合茶藥

有敕玉節方來寶奩是錫取雪芽于北苑輟珍劑于尚
方并寵行人用昭眷意

賜御筵

有敕卿等遠持華節近來次方行登象日之畿重錫需
雲之宴益加盛禮庸示眷私

平江府賜御筵

有敕履靖之始修聘甚勤行既次于近藩禮宜加于載

燕是為異渥其服多儀

赤岸賜酒果

有敕卿等遠從萬里來賀三朝望觀闕以非遙賜壺遵
而加腆尚承眷渥以締歡盟

賜御筵

有敕履端之始將命以來既聞饗甸之登宜厚賓筵之
錫春私所遠使介維均

賜使副春幡勝

有敕綵杖土牛方舉春郊之禮寶幡金勝爰如使客之
恩和氣所鍾歡盟益厚

賜三節從人春幡勝

有敕卿等修好時重履端爰加厚于使華乃分頒夫節
物儀雖辨等意則均優

朝見畢歸驛賜酒果

有敕卿等既覲軒墀歸安次舍俾厚壺邊之賜少休車
馬之勞母曰彝章實惟至意

賜生餼

有敕卿等進講賀儀退休賓館既設豆邊之渥仍加饗
餼之頒尚體眷懷以頒異數

賜內中酒果

有敕卿等來趨日正茲遇歲除出御府之甘芳助驛度
之晏集益修賓禮用介春祺

賜被褥鈔鐸

有敕卿等來趨元日將覲大昕爰加賜于寢衣仍頒

夫盥器用安次旅以示恩私

入賀畢就驛賜酒果

有敕歲律更新使軺遠暨酒致屠蘇之勝盤隨枰栢之
芬均受春陽益增和氣

玉津園射弓賜御筵

有敕茲開禁籞用設射侯既觀舍矢之能爰錫在公之
燕有發必中不醉無歸

朝辭畢歸驛賜酒果

有敕卿等甫辭殿渥尚憇賓郵載為川陸之行更厚壺
籩之錫益祇春渥以示初終

賜大銀器

有敕卿等既成聘禮將治歸裝乃領什器之豐皆用五
金之次是為異渥式助遐征

回程賜御筵

有敕卿等成禮言歸登途欲遠仍特頒于載燕曾不替
于初筵春日尚寒賓僚加厚

賜接伴使副春幡勝口宣

有敕卿等往迓使軺還趨行闕值陽和之屆律加好賜之如儀其服殊私益祇厥事

金國賀登寶位使人到闕口宣

賜被褥鈔繹

有敕卿等肅將使指來賀君臨爰頒盥洗之珍仍致衾茵之麗用安次舍其服思私

賜使副春幡勝

有敕卿等遠修邦好遠遇春陽爰加節物之頒庸示使
華之寵尚祇渙涯益締歡盟

賜接伴使副春幡勝

有敕卿等迓客于畿還朝有日當此新春之始特加好
賜之優其體者私益修使事

賜三節人從春幡勝

有敕春起于東使來自北舉鯨杖土牛之禮頒寶幡金
勝之華儀則有差恩無所異

朝見畢歸驛賜御筵

有敕卿等來致賀儀歸安賓館念川途之勞動設樽俎
之優隆庸示眷勤少休跋履

賜酒果

有敕卿等拭圭修聘將幣成儀爰加芳醞之頒仍厚嘉
穀之錫少休徒御以俟賓筵

密錫大銀器

有敕卿等陳儀既備執禮滋勤欲深示于情文爰密頒

夫用器非金之貴惟意之將

賜內中酒果

有敕卿等未修邦好克謹賓儀分御府之甘芳示使軫
之華寵雖云例奉蓋出殊恩

賜生餼

有敕卿等既謹朝儀退安賓次俾廩人之致餼冀使者
之加餐異數相望春懷增厚

特賜御筵

有敕卿等趨朝甚謹授館方安修客禮以無違秩賓筵
而有楚特將予意庸慰爾勤

特賜酒果

有敕卿等進謹朝儀退安賓館賚此壺尊之腆加以肴
核之珍蓋示殊私尚承好賜

玉津園射弓賜酒果

有敕卿等肅駕使輅共修賓射諒慰四方之志想聞百
發之能爰錫甘芳少休勞勩

賜射弓例物

有敕卿等講射寶津視儀相圍爰首領于弧矢仍加賜
夫金縉張弛具宜恩私愈渥

朝辭畢歸驛賜酒果

有敕卿等講射寶闕事畢言旋錫列甕之芳醪洎加籩
之珍果少休賓馭行屆歸程

賜御筵

有敕卿等屢勤入覲茲遂告歸更加籩豆之優不替權

輿之始尚祇燕禮徐戒行裝

特賜銀

有敕卿等備成使事俱超歸程特領山溢之珍用助清馳之役毋云故事蓋示優恩

回程赤岸賜酒果

有敕卿等已祇聘禮初計歸程迺馳賜于上尊仍分領夫碩果少安旅次徐屆征遠

賜御筵

有敕卿等持禮言還戒途伊始爰啓在公之燕用華修
聘之歸既秩賓筵遂登客路

賜龍鳳茶金鍍銀合

有敕卿等邦好既修回途未遠珍茗選春芽之賜寶奩
分山溢之餘是曰殊恩用將厚意

平江府賜御筵

有敕卿等賀禮既周歸程寢遠甫即蘇臺之次載修鎬
燕之儀益向長途毋忘厚意

鎮江府賜御筵

有敕卿等遠來致慶倏遂言旋念北客之改轅即南徐而錫爵眷私無替禮貌采修

盱眙軍賜御筵

有敕卿等來持慶禮回次邊疆欲締好于兩朝復陳儀于四筵行當上道更祝加餐

金國賀正旦使人到闕回程口宣

賜龍鳳茶金鍍銀合

有敕卿等將命言旋登途寢遠飾寶奩而加惠實珍茗
以分頒深示恩私式安行役

平江府賜御筵

有敕卿等來賀履端更勤歸報游錫吳門之宴用津燕
驛之行春日尚寒征途加護

鎮江府賜御筵

有敕肅持玉節還次丹陽仍優宴豆之儀用慰川途之
役其均既醉毋憚遙驅

盱眙軍賜御筵

有敕卿等遠賀元正沆修使事爰肆筵于邊服將夙駕
于歸逢春禮之私始終無異

報謝使副林季友郭正己回程到闕傳宣撫問并

賜銀合茶藥口宣

慶元元年
正月一日

有敕卿等握節言旋登載告至想風寒之區薄念川陸
之艱勤若酌寶奩併加存撫

金國諭成使赴闕口宣

嘉定元年
八月

盱眙軍傳宣撫問并賜御筵

有敕卿等載馳原隰始屆疆陲當和議之既成喜歡盟
之復締首加勞問仍示宴私

鎮江府賜御筵

有敕卿等持節鼎來揚旌既濟望信書之漸近啟賓燕
以加勤其體眷慈式遘行邁

鎮江府賜銀合茶藥

有敕卿等肅擁使華來修邦好爰厚寶奩之錫用加珍

品之領庶滌煩勞式祇延佇

平江府賜御筵

有敕卿等遠將信幣來次近畿嘉屬使之再馳宜賓筵
之三錫是為異數用資行人

赤岸賜酒果


有敕卿等徒御遠來郊圻密邇再領于甘醴仍分錫
夫嘉肴行色休休賓儀是飾

賜御筵

有敕卿等選驅使傳切近國郊將修昕旦之儀重錫需
雲之宴式昭春意益謹前窺

賀生辰國書

使介載馳伸講誕辰之慶郵音垂諭少遲良月之期虔
致函書遠將篚幣用祝無疆之莫益堅有永之盟施及
黎元同躋仁壽



攻媿集卷四十七

欽定四庫全書

集部

攻媿集卷四十一

四十一

詳校官石中允臣薩敏

主事臣呂雲棟覆勘

總校官庶吉士臣倉聖脉

校對官中書臣王鍾泰

勝錄監生臣崔鶴立

欽定四庫全書

攻媿集卷四十八

宋樓鑰撰

內制

明堂禮畢告謝五岳四瀆祝文

原集此首前有告謝天慶觀青詞

滿散朱表今刪

伏以祇奉慈謨親行大嚮多儀既備景貺孔昭實惟山川之靈陰相馨香之薦尚歆誠悃滋介純禧

明堂禮畢祭謝五嶽四海四瀆祝文

伏以肇祀合宮告成熙事惟二儀祖宗之禮皆已備修
凡五岳河海之神悉均望祭雖靈祠之尚遠顧虔報之
敬稽

明堂禮畢奏謝諸陵表文

○原集此首後有瑞慶
節建康府茅山崇禧觀

啟建祝壽道場青
詞滿嶽宋表今刪

伏以嗣歷云初奉先為大適三歲當郊之際祇薦總章
惟列聖在天之靈俯垂陰佑雖潔齋之粗備懼誠悃之

未孚高厚顧歆神明來格既訖成于熙事敢恭布于滌
衷遙望陵宮不勝感涕

安穆安恭皇后改謚告太廟祝文

伏以仰惟烈祖將祔太宮易別廟之舊稱從成孝之尊
謚先期以告英鑒其臨

大行至尊壽皇聖帝靈座祝文

伏以集百官于南郊首定稱天之謚奉二后于太室改
從祔廟之名將舉盛儀敢伸昭告

奉上孝宗皇帝謚冊寶成穆成恭皇后改謚冊寶

奏告天地社稷十神太一祝文

○原集此首前有瑞慶節滿散道場

賜三省樞密院殿前司馬軍司步軍司孔香口宣瑞慶節萬壽觀滿散道場青詞滿散朱表瑞慶節太一官設醮青詞滿散朱表又此首後有天慶觀報恩光孝觀青詞太上皇帝本命萬壽觀設醮青詞滿散朱表今並冊

伏以壽皇即遠方定于尊稱祖后俱從當更于舊謚將

嚴寶冊敢告神祇

孝宗皇帝謚號下日改換銘旌奏告祝文

伏以烈祖在天南郊定謚既遵節惠之典載飭神明之
旌仰惟威靈俯鑒誠恪

孝宗皇帝櫛宮神圍除去鋪屋窠木等奏告昭慈
聖獻皇后永祐永思陵祝文

伏以皇祖上仙期方臨于七月稽山庀役地實近于諸
陵暫撤檄廬稍開宰木懼有驚于神御敢先叩于威靈
仰冀洪慈俯加陰祐

孝宗皇帝祔廟修製祐室太廟殿宇廊廡權奉安

祖宗神主于初獻廳時前奏告祝文

伏以仰尊烈祖將祔太宮奉二代之宗祧飾累朝之祐室暫遷神主敢告威靈

權奉安神主祝文

伏以崇飾太宮奉遷神主少寓齋居之邃以須祐室之成敢冀憑依用伸虔告

祭祀太廟土地祝文

伏以修崇清廟升祔孝宗念斤斧之交興懼神祇之或

聳敢先昭告願相多儀

閻仲績康伯修奉櫬宮傳宣撫問并賜銀合茶藥
及啜賜一行官吏工匠等犒設口宣

有敕卿等視役山陵宣勤夙夜勞風寒之區薄頌茗劑
之珍芳好賜有差工徒無怠

孝宗皇帝梓宮發引祝文

啓櫬

伏以阜陵既飭靈駕將行遂從禹穴之歲式啓商楹之

殯攀號何及昭告宜先

前及日初昏奏告

伏以窀穸有期念終天之永訣靈輿即遠痛詰旦之將
行重惜分陰窆增孺慕

發引時前祭告

伏以六紼有行九京復遠追念抱孫之愛阻神臨穴之
勤少駐須臾不勝哀殞

啓真行禮

伏以於穆孝宗將趨神穴爰諏穀旦肅引靈輶顧挽緋
以難留遂逆逢而即遠音容愈邈慟哭何堪

祖奠行禮

伏以陵宮既備愴我祖之何之緋翼啓行痛仙游之不
返杼龍輶而永訣駕鯨浪以遂東祖祭是修哀號愈切

下皇堂時前奏告

伏以於皇文祖將就散塗愴永闕于衣冠痛莫親于兆
域式安玉體絕望天顏

掩攢畢迎奉御容詣下宮奉安

伏以明明我祖奉窀穸以既安雖雖在宮痛威容之愈
邈天顏惟肖神宇具依不勝追遠之悲敢致妥靈之告

孝宗皇帝梓宮發引奏告天地社稷太廟別廟太
一宮祝文

伏以烈祖上賓阜陵告備慈啓蔽塗之舊將趨兆域之
蔽敢告先期仰祈陰佑

至攢宮奏告帝后祝文

按原集此首前有天慶觀
報恩光孝觀青詞此首後

有冬至節孝宗皇帝几筵水陸道場齋文
皇帝本命萬壽觀音詞散滿朱表今並刪

伏以奉皇祖之嚴塗勉襄大事近累朝之兆域敢告威
靈未遑洛邑之歸尚奉會稽之奠仰祈孚佑咸遂安安

孝宗皇帝虞主自浙江還重華宮鼓吹導引曲

孝宗純孝前聖更何加高臨處重華丹成仙去龍輶遠
越岸暮山遐波臣先為捲寒沙來往護靈槎九虞禮舉
神祇樂萬世佑皇家

孝宗皇帝神主自重華宮至太廟祔廟鼓吹導引

曲

吾皇畫孝宗廟務崇尊鉅典備彌文巍巍東向開基主
七世祔神孫追思九閏整乾坤環宇慕洪恩從今密邇
高宗室千載事如存

孝宗皇帝虞祭畢卒哭行祭禮祝文

伏以阜陵後土既修易奠之虞班祔有期遂卒無時之
哭仰遵禮典莫究哀悰

孝宗皇帝神主祔廟并成穆成恭皇后神主同時

祔謁升祔奏告祖宗后帝祝文

伏以竣事阜陵既畢九虞之祭寧神祔室實同二后之
升祖宗是依昭穆以序實循禮典敢告威靈

孝宗皇帝祔廟樂章

聖人之德無加于孝思皇孝宗履行立教始終純誠非
曰笑貌於萬斯年是則是做

太廟修置太祖至高宗室后神主祔室畢工時

前奏告還殿室祝文

伏以班祔孝宗崇新清廟備累朝之祫室奉列聖之神
靈敢告先期冀垂昭格

還殿正奉安祝文

伏以阜陵竣事太室鳩工爰蒞禮于宮庭用妥靈于宗
祏以享以祀來燕來寧

孝宗皇帝祔廟時前告遷成穆成恭皇王神主詣
幄次權行奉安以俟同時祔謁升祔祝文

伏以阜陵竣事奉神主以即安室祏致嚴安柔靈而並

祔稍遷遂幄將奠太宮惟時之良敢豫以告

孝宗皇帝神主祔廟前二日奏告祝文

原集此
首前有太

上皇帝本命太一宮設
醮青詞滿散朱表今刪

天地

伏以尊祖禮嚴因山事畢用宏闢于宗祏將升祔于靈
儀信宿之先潔齋以告仰祈昭鑒永賴孚休

宗廟

伏以於皇文祖既畢安虞爰攷禮于前朝蓋安靈于太

室仰瞻列聖敢告先期其永無疆克昌厥後

別廟

伏以惟我孝宗將登清廟設九虞而既畢奉二后以同
升永世是承前期敢告

太社太稷

伏以永阜訖功孝宗升祔惟億載萬年之鉅典告九土
五穀之明神願鑒先期式垂孚佑

太一宮

伏以烈祖上賓太宮升祔國之大事其敢弗虔天之尊
神是當先告冀垂昭格用妥威靈

改元慶元奏告昭慈聖獻皇后永祐陵永思陵永
阜陵成穆成恭皇后攢宮表文

○原集此首前有
天慶觀報恩光孝

觀音詞
今刪

伏以仰奉慈謨勉承丕祚將興嗣歲首議嘉名惟慶歷
最為盛時而元祐尤伸公道履端伊邇敷號云初敢告
威靈式祈孚佑

改元奏告祝文

原集此首前有皇帝本命萬壽觀設醮青詞滿散朱表今刪

天地

景靈宮天慶觀報恩觀同

伏以纘緒何堪改元惟謹稽仁祖致平之盛洎奉陵嗣德之初合取嘉名用綿丕祚敢伸昭告仰冀享休

宗廟

景靈宮帝后諸陵表文同

伏以承列聖之休謹踰年之制合太宗明皇之號有唐實創于嘉名仰慶歷元祐之時我宋尤稱于盛際爰筆新于歲紀敢虔告于威靈

社稷

伏以嗣位承休踰年改號取慶歷元祐之盛期紹重規
仰勾龍后稷之神用伸昭告尚祈靈佑益介災圖

太一宮

伏以嗣歷云初紀年敢後合兩朝之盛爰號慶元告十
神之靈用祈福佑尚惟昭鑒永助丕基

上辛祀感生帝以太祖升侑奏告祝文

天地

伏以祀感生之帝蓋已有年侑創業之君始從今日敢
伸昭告仰冀孚休

宗廟

伏以推功藝祖既居東向之尊升侑感生茲謹上辛之
祀仰瞻列聖豫告先期

社稷

伏以感太微之精夙祇大祀推藝祖之烈升侑明神惟
社稷之炳靈設豆籩而致告

諸陵諸橫宮表文

伏以上辛穀旦大旅盛儀爰推立極之功克配感生之祖遙瞻陵域敢告吉期事體至嚴威靈斯鑒

僖祖順祖翼祖宣祖還正殿奉安祝文

伏以新廟是營羣言允協爰卜太宮之右用安四祖之靈敢冀威神式歆典祀

奏告太廟祝文

伏以肇舉盛儀宏開別廟祧僖宣之祀視夾室以尤嚴

遷順翼之靈祔先公而惟謹仰祈列聖俯鑒忱表

春分前修飾懋宮奏告諸陵祝文

伏以歲序流易春陽正中既當雨露之濡益愴宮陵之念繕修惟謹種藝以時敢告先期尚祈昭格

進奉皇太后生辰表詞

原集此首前有太上皇帝本命太一宮設醮青詞

滿散朱表今刪

伏以尊居長樂方歌難老之詩時屆芳春適啟誕彌之節邦家均慶宮壺交欣

中賀

恭惟壽成皇太后殿下德

合坤元心同天大贊淳熙之內治恭儉具孚命菲質以
嗣興恩私未報方具游神澹泊玩志清虛益觀過歷之
期坐閱後天之箕臣夙承大造獲奉慈顏含飴弄孫咸
仰姜任之盛戲綵為樂惟祈箕翼之年

伏以修蘭亭之禊事方樂春陽上椒殿之壽觴仰尊祖
后壽成皇太后殿下恭願坐膺多福日介脩齡國治家
齊合三宮而同慶天長地久見千載之太平

太陽交蝕祭告太社祝文

伏以季春五陽日食于朔側身修行朕不敢怠伐鼓于社彞章具存尚抑羣陰以助陽德

陰雲不見交蝕祭謝祝文

伏以清臺獻占太陽當食引咎自省方切兢兢東方未晞陰雲布護實惟神賜敢恃天休

孝宗皇帝小祥奏告永阜陵櫬宮表詞

○原集此首前有皇

帝本命萬壽觀設醮青詞滿散朱表太上皇帝本命太一宮設醮青詞滿散朱表又有太一宮祝延

太上皇帝聖壽設醮青詞滿散朱表今並刪

伏以念茲皇祖遽驚新穀之升瞻彼阜陵采切高山之
仰恭惟尊祀皇帝恢宏帝業垂裕孫謀茲當祥練之初
敢後馨香之薦馳誠惟謹隕涕無從

改元嘉定奏告祝文

開禧三年
十二月

天地景靈宮天慶觀報恩光孝觀

伏以祇奉洪圖寔逾周紀屬時多故欲開嗣歲之祥乃
選嘉名用冠新元之首敢伸昭告祈介宏休

宗廟諸陵

伏以承列聖之休方深夕惕紀新元之號式介春祺開
景運之亨嘉期武功之耆定仰惟敷佑敢不欽承

太社太稷

伏以為國家者尤謹于紀年有社稷焉敢稽于歲事仰
冀神靈之佑庶開嘉定之期肇易美名爰伸昭告

太一宮

伏以國之大事莫重改元天之尊神當嚴昭告願介亨
嘉之會遂成耆定之功益卑多祥以興嗣歲

諸陵櫬宮表文

伏以祇奉洪圖寢踰周紀屬時多故欲開嗣歲之祥乃
選美名用冠新元之首取商宗嘉定之首晞武王者定
之功仰冀孚休敢伸虔告

閏四月起居諸帝后表詞

嘉定
元年

諸帝旦表

伏為積分成閏適當孟夏之餘告廟有儀敢飭先王之
典恭惟諡號皇帝德參高厚仁及華戎仰賴在天之靈

益綿奕世之慶式供嘉薦用妥威神

諸后旦表

伏為元年建巳閏月定時既當視朔之初爰謹奉先之
禮恭惟謚號皇后坤隆厚載世嗣徽音慨莫望于聲容
尚永綿于慶羨式修孝敬敢薦馨香

諸帝望表

伏為閏以正時方謹居門之日月惟既望敢修朝廟之
儀恭惟謚號皇帝澤寔羣黎慶縣百世望僊游而雖邈

席丕祚于無疆爰薦孝思用循彝典

詣諸后望表

伏為四月維夏閏式紀于歸餘先后在天禮用陳于改
望恭惟謚號皇后母儀如在神御即安永陪衣冠之游
用綿宗社之慶奉承思孝莫薦惟馨

洞霄宮徑山天目山龍井祈雨祝文

伏以國方多事所願年豐春夏以來甘澤未足種不入
土遺蝗已繁當寧興思旱氣甚廣近雖得雨猶未霈然

遣官禱祠齋心以俟庶祈響答三日為霖大慰九農敢
忘伸報

故皇子肅王均興靈前夕敕祭祭文

嗚呼哀哉頃欣嬪御得此誕育晬盤將設何去之速情
之所鍾念念蠶蹙苗而不秀無乃太促一奠寓哀往從
幽卜

成肅皇后小祥奏告永阜陵橫官香表詞

伏以祖后上賓尚想含飴之愛歲華遽易忽驚鑽燧之

期遙瞻陵寢之嚴倍切音容之感期已久矣儼追慕以
如新練而慨然顧加隆而敢急肅陳寶炷用表哀誠

雨澤愆期奏告祝文

天地十神太一九宮貴神嶽鎮海瀆

伏以旱魃為災間有不免在于九歲利害尤深疆場甫
寧流徙未復中外空匱正望有秋屬茲常暘種或未入
苟失歲事何以有邦顧慚菲涼久蒙教佑高高在上

地皇

祇云后
土靈祇

俯鑒哀祈三日為霖庶以活國側身引慝恭俟

嘉應

宗廟別廟

伏以時方常暘憂懼實甚種未入土何望收成間有一
雨未能霑足齋心致禱靡神不宗在天之靈願垂矜憫
有請于帝救此下民沛為膏澤徧及遐邇迄用康年以
壽國脉

太社太稷雨師雷師風師

原集此首後有天
壽觀報恩光孝觀青

詞今
刪

伏以社稷與君以民為重民之司命以食為天時方多
艱仰望一稔久矣不雨雨又復霽傾心禱祈願垂嘉答
廣布甘澤普濟羣生報以秋冬其敢不飭

禳蝗祝文

○原集此首前有皇帝本命萬壽觀設醮青詞滿散朱表今刪

天地

伏以稼穡維寶方興播種之功蝗蝻為災備舉禴禳之
術雖都城之少靜顧畿甸之尚繁遠邇何殊焦勞則一
敢祈上帝地云后土俯念斯民既救疇神盡屏衆多之害更

令田祖益昭秉畀之靈

社稷

伏以禾苗方茂社稷焉依雖旱魃之已驅復飛蝗而為
孽神既職幽冥之事朕不勝宵旰之憂爰致禱祈願垂
感格掃螟蟲而無迹庶穡稼之有成

醜神

伏以比以飛蝗之作孽嘗遵故典以祭醜都邑頃清無
非昭答郊圻未免敢怠祈禳惟盡除振振揖之災庶

幾有蕝蕝芄芄之望

雩祀祝文

前一日奏告太宗室

伏以旱魃挺災禱而既應覆出為虐其害愈深爰即紫壇仰祈清昊熙陵之德實配彼天豫告威靈願垂昭格有請于帝蘇此遺黎

上帝

伏以旱氣方隆禱既如響飛蝗肆孽禳之亦消柰何常

賜又以示譴朕實不德民則非辜祇被郊丘謹修雩祀
仰祈上帝哀閔下民蚤興雲雷大沛雨澤無有遠邇均
被滂沱坐變凶年復成樂郊邦本所繫惟天佑之

太宗

伏以天災流行固知代有今歲之旱尤所弗堪禱雨應
期方幸周浹陽居大夏茲焉益驕爰即泰壇恪修雩祭
稽諸故典作主侑神曾孫菲涼宜致疢癘殃及萬姓實
惟焦心在天之靈願垂於閔亟頒甘澤以迄康年

皇地祇

伏以至哉坤元厚德載物生我百穀以活斯人比雨應
祈種幸入土苗而未秀又復亢陽滌滌山川物意焦灼
國有故典禱旱以雩后士資生敢伸虔告願垂大惠敕
使百神三日為霖溥及萬域以蘇焦槁以致豐登庶幾
有邦可以長保

再奏告宗廟別廟

伏以顧惟菲涼負荷至重常暘之罰乃徧黎元飛蝗未

清雨而復旱投誠列聖威靈在天閔予曾孫以及赤子

亟垂昭格沛以甘霖迄用康年保邦是賴

別廟云雨而後旱茲焉致

禱願昭感通

太社大稷嶽鎮海瀆五方山林

伏以惟民之生以食為命聰明正直亦惟相依今茲旱災日既太甚側身致禱徧于百神仰冀為霖沛然四洽庶有秋之可望豈嘉報之敢稽

丙中禳蝗文

按原集此首前有咸肅皇后中元節水陸道場齋文今刪

伏以旱魃云初遂致飛蝗之作孽雨帥既應不圖遺種
之滋繁遠侵閩楚之疆近集郊闕之內遇災是懼惟帝
焉依願敕百靈盡除螟螣之害俯令萬國咸保稻梁之
豐

祈雨感應報謝祝文

天地

伏以涉春以來旱氣甚廣種未入土上下隱憂宵旰齋
心日致忱禱皇皇后帝

皇地祇云
坤元后土

實賜鑒臨曰雨而雨

隨時乎應藝我稷黍寢成小康盡披萬物不足以報矢
詞告謝少致衷誠

宗廟

伏以亢陽為災幾害穡事國計所繫無所控祈夙夜投
誠父母先祖敢期上徹在天之靈霖霖滂沱幾無虛日
旱魃退聽良苗勃然所在中熟實踰始望傾心報謝其
敢弗虔

別廟

伏以亢陽已甚嘗致禱祈甘雨以時實為孚應茲成中
熟獲濟民生幽贊為多可無致謝

十神太一九宮貴神

伏以民為邦本食乃民天歲一不登何以為國頃以旱

甚禱于尊神

九宮貴神云
禱于貴神

如饗應聲隨車滂沛肅時雨

若易歟為豐敢罄謝誠尚求終惠

嶽鎮海瀆五方山林

伏以國方多事豈堪旱災虔誠禱祠靡神不舉時雨之

降實由山川三日之霖四遠霑足歲事將就虔謝敢稽

太社太稷雨師雷師風師

○原集此首後有天
變觀報思光孝觀青

詞今
刪

伏以顧惟菲德致此亢陽仰賴百神鑒予忱禱風雨時
至雷霆疾驅遠邇均霑成此中熟一祈一報敢怠此誠
尚惟居歆益加敷佑

祭告醜神

蟲賊為災秉畀有資于田祖蝗蝻肆孽掃除實賴于醜

神既隨禱以盡消俄蔽空而後至人心相恐歲事可憂
疑有物以驅之殆非力可及者載修祀事仰叩高靈俾
食葉食心之妖罔存噍類成多黍多稌之慶還保豐登

攻媿集卷四十八